



*Comme nostre Seigneur Iesus-Christ monta au Ciel quarante iours
apres sa Resurrection.*

NOSTRE Seigneur Iesus apres auoir souffert Mort & Passion ressuscita, & se montra soy-mesme viuant, avec plusieurs approbations, estant veu par ses Apostres & Disciples par quarante iours, & parlant du Royaume de Dieu, & mangeant avec eux, leur commanda qu'ils ne partissent point de la ville de Ierusalem; mais qu'ils attendissent la promesse du Pere, laquelle (dit-il) vous auez ouye par ma bouche, car Iean a baptisé d'eau: mais vous serez baptisez du S. Esprit dans peu de iours. Eux doncques estant assemblez l'interrogerent, disans: Seigneur, reestablirez-vous en ce temps-cy le Royaume d'Israël? Et il leur dit, Ce n'est point à vous de connoistre les temps ou les saisons que le Pere a mises en sa puissance, mais vous receurez la vertu du S. Esprit venant sur vous, & me ferez témoins, tant en Ierusalem qu'en toute la Iudée & Samarie, & iusques au bout de la terre. Et quand il eut dit ces choses, il fut esleué, eux le regardans, & vne nuée le couurant l'osta de deuant leurs yeux: Et comme ils le regardoient aller au Ciel, voicy deux hommes se presenterent deuant eux en vestemens blancs, qui leur dirent, Hommes Galiléens, pourquoy vous arrestez-vous regardans au Ciel? Certuy Iesus qui a esté eleué en haut d'avec vous au Ciel, viendra ainsi que vous l'auuez veu aller au Ciel.

S. Marc Chap. 16. S. Luc Chap. 24. Actes des Apostres Chap. 1.